

白  
華  
後  
稿

白華後稿卷之十二

南滙吳省欽沖之纂

男 敬樞星宰  
敬沐起元 校字

序四

江西德化余氏家譜序

壬子秋予典江西試還 朝道湓城余君連城率其子  
需元走謁於館舍別且四十年矣詢之知以歲貢需次  
校官不與試而需元卷薦不售越乙卯舉於鄉爲予延  
入學幕家問不絕寄予家譜一編求序譜之言曰余氏  
出秦由余其聞者宋曲江忠襄公靖爲最江右之余出  
分寧其後由都昌再徙德化累世蕃盛登仕籍者數人

籍學官弟子者數十人惟遠祖浙江左參議諱文獻者以嘉靖甲辰進士起家故進士貴予考凌氏統譜明以前載余氏二十九人而江西得五明進士題名碑錄余氏九十五人而江西得十六第凌氏列元淮西行省左丞忠宣公闕合肥人而不知忠宣之父沙喇卜臧固唐兀氏今譯改塘古忒氏以河西武威人官廬州忠宣遂以州人登進士又忠宣死事時殉者十八人有知事余中凌氏既譜忠宣而於中則又遺之譜中可譜忠宣不可譜忠宣而不及中更不可也西江志言文獻官浙江左參政是又在參議之右與譜小異往予居鄉時有余俞二家

相約爲兄弟聞者以謂余从人俞从人苟不識字焉能辨姓至如吳出泰伯虞出唐叔皆姬姓而上古之氏有虞無吳吳卽虞省文猶庠乎嘑呼彪彬處處櫨祖之類虞之氏又有出虞舜後者譜牒之學至墮而不可惡至動而不可亂宰相系表曾有幾家由是而進士不得不重要之士之自立與否亦不必以進士爲引重也予家之進士自季父世賢始占籍奉賢後歸南漚而乾隆戊辰進士碑錄皆書湖廣漢陽縣人是碑錄不無誤矣恩貢拔貢歲貢副貢行文家得稱某貢進士雖竊附進士之名而於義無所害焉君嘗從予季父遊故予與君父

子不啻紀羣之誼旣惜君之未得以進士進而又卜需  
元之必有以昌其家而光其譜也縣之名德化者二冠  
以江西別之閩蓋史例云

成都郭氏系譜序

郭氏功名之盛子姓之蕃衍莫過於唐中書令汾陽忠  
武王子儀有子八壻七自談賓錄作子七人壻八人沿  
訛至今丹青家徵爲故事王子孫尙主者四而曖爲第  
六子尙代宗第四女昇平公主曖又有四子金元二史  
郭企忠郭寶玉傳皆歷叙其先世以爲王後裔而顏魯  
公撰王父祁國公敬之家廟碑言王兄弟九人寵多族

大信有自耳今大興令成都郭君立誠爲予視學時所得高才生頃出其系譜示予言王子若壻與史合又言暖四傳至光祿大夫瞿遷吉安之十善鎮其後遷白沙遷錫州遷攸鎮遷烏兜遷定南皆不出吉贛境凡三十餘傳而君之祖懋臣從祖贊乾以我朝雍正初由定南遷四川之隆昌繼遷成都君父諱其述胚胎家學鄉試八薦不一售齋志中壽有六子舉厲文行而君以優行貢成均歷京縣贈兩世如君官階朝議大夫蓋累世播遷之狀啓佑之心庶幾以少慰矣君之請序於余也以舊譜號叔之子書周武王封於東郭後以郭爲氏致

疑余惟號有二號仲之後爲西號滅於晉號叔之後爲東號并於鄭鄭氏氏族畧其以國爲氏者號下有郭猶之韓後有何春秋莊二十四年郭公公羊音義郭音號亦如字莆田鄭氏曰號謂之郭聲之轉也然則郭卽號東郭卽東號吳興凌氏所稱周文王季弟號叔受封於號或曰郭公因以爲氏差可依據也郭之望在華陰馮翊而自隗以後若解若憲若躬若鎮若巨若泰若賀若丹若伋若昌若咍若欽若亮若玉著於漢若淮若成若嘉著於魏若琦若誦若奕若璞若荷若文若默若舒若翻若希林若翰若瑀若澄之著於晉其著聞俱在王以

前而王之功名與其德克以昌後後唐莊宗時宰相豆盧革韋說等附郭崇韜以其姓郭因以爲王後裔崇韜遂以爲然過子儀墓下馬號慟而去聞者頗笑之第通譜附籍之風自唐始盛唐之國姓無定論焉則以居得姓之東郭北郭豈必無譌爲單姓者且子雲之序揚氏以爲其祖食采晉陽後爲陽侯張衡言晉大夫食采於陽爲楊氏有罪而楊氏滅無所謂楊侯者陽之從楊若揚其形譌異況號郭之以聲沿轉自唐時已然耶守是譜者深思夫播遷之狀與啓佑之心奕世載德自致功名安見華陰馮翊之外不於成都著望哉



蘇門山人詩存序

菱湖爲歸安一聚落居人僅千戶而誦弦荅響每鄉舉

舉五六人少亦三四人國朝來冠南宮者三人孫氏

有二

見龍康熙癸巳辰東乾隆壬辰

及第者三人孫氏亦有二

在豐康熙庚戌

辰東見上

予三主浙闈孫氏舉樹本樹堦科名之美僕指焉

莫之先也子里居杜門今中秋後八日闈者投樹本兄

弟去秋書言族兄奕升以戊午北闈特奏名賜舉人

已未試南宮特奏名賜檢討南歸舊里挈舟三日程

走謁幸定其所爲蘇門山人詩而序之予初不知奕升

奕升時年八十二長子且十年蒼髯岸偉耳目聰明嘗

應子兩舉皆罷去其祖惕崖

諱國珍以康熙癸巳舉人官錢塘縣學教諭 考

沅亭

諱汝馨丙辰博學鴻詞徵士是科舉人

兩翁窮經樸學舉正南雷西

河經說甚夥蚤師杭氏堇浦厲氏樊榭壯而貢太學友食於賓幕講席間其舅氏泊村沈太守瀾其友朱翰林梅崖皆嘗序其詩其請予序若心折予之詩若文而予詩與浙派少異趨良以陶寫性靈發揮忠孝流連光景刻畫體態四者不可偏以廢至堇浦樊榭音不盡出之雅猶南雷西河之學之不盡醇乎醇奕升遊堇浦樊榭之門而取其良舍其枯其曰蘇門山人者祇取孫氏故事而其家世故菱湖當少日從官于杭卽南屏山麓孫

太初故居世所稱高士塢者構數椽於其旁請山舟侍講扁之曰少初山房擬投老於此予以太初家本三秦不爲獻吉所束縛雖終老苕溪相偕五隱而西湖上一僧一鶴一童子煎茶之況至今特稱之奕升負才俊拔不得志於有司卽予亦難以辭失士之責其入幕固不能如唐人之薦授其主講又不能如宋元人之署官祇以年老授銜較勝於及第之追賜使蚤登著作之庭抉發其先人與其師之學經國大業不知當復何如乃憔悴專一之餘忽嘗禁鬱抑以見國家元會盛際翔洽周徧如奕升所遭裴湖人曾有受之者歟予吟覽數四

凡半月而論定中年後往往神似小長蘆釣師而奇崛  
奮發澤以中和信有如鄭繼之稱太初者其曰詩存蓋  
奕升自刪什之四予又刪其四之七八是奕升之願望  
而亦以塞樹本兄弟之請也夫

丁孝子旌孝錄序

女子年三十以下夫死不改適謂之節男女子子婦事  
父母舅姑有性行謂之孝節孝庸德也功令有旌所以  
正人心端風俗非名求名應之謂也近世縣府志列女  
門樹坊立扁節非槩苦作志者不敢去取其間謂致鬼  
責彼以孝書以孝舉者每州縣數年數十年不能一二

人間有之亦惟是强者割股弱者廬墓勉至之而未必  
性與行之俱至故孝義視節義難婁人丁履豫叔安既  
棄儒則日綜兄履恒弟履謙益履醫療修脯之所入以養母母  
兄以其不願娶爲置妾妾有子遂不入妾室竟日夜奉  
母居嘉慶二年十二月二十六日母將殮畫師貌母象  
履豫諦審良久俄長慟仆地遂絕年僅三十子考明洪  
武二十六年之令曰臥冰割股上古未聞倘父母止一  
子或割股而喪生或臥冰而致死使父母無依宗祀永  
絕反爲不孝之大自今聽所爲不在旌例其後或不旌  
或旌而厲澆激薄要有難人之所難者至如隋之田翼

唐張儉女子敏直妻張氏一以慟母絕一以慟父絕二史不詳其他事要之以孝而死非以死而孝較冒賊刃奪虎口者之所爲其肫肫慘慘哀不能勝莫之致而至矣嗚呼使彼果有殉死之心則絕水漿絕食何詎不可稍延惟不期絕而絕一絕不復甦此所以罕見於史書乃履豫丁強壯之年蹈毀滅之戒其行絕殊其德庸甚君子哀其志原其情夫何忍以割股廬墓之所爲相提並論也履豫少事父如事母不具書而履恒履益以醫療修脯之所入委之履謙以奉母其亦孝乎惟孝哉曰旌孝錄者錄其事實結狀牒詳題覆之實而詩若文附

爲履璫字叔安今結題曰孝子從東海孝婦例也

孟子篇叙序

太史公稱孟子與萬章之徒作孟子七篇漢藝文志依七略稱孟子十一篇風俗通稱孟子中外十一篇中猶漢儒林傳言中文中古文蓋祕閣藏本卽今趙氏章句本其外書四篇曰性善辨曰文說曰孝經曰爲正則當時學官本民間行本而趙氏不爲之章句者也章句每篇分上下凡十四卷序全書之首曰題辭系每章之末曰章指系全書之末曰篇叙篇叙者叙每篇第一章相次之義頗近穿鑿不若題辭之醇乎醇而每卷首又各

有篇叙其題辭明嘉靖監本徑佚去賴常熟毛氏刊汲古閣本取以傳又錢氏曾讀書記謂篇叙世罕得見藏書家宜廣其傳錢氏多善本而猶佚去篇叙若章指與每卷首之篇叙爲宋孫氏割入正義淆混不真賴曲阜孔氏繼涵於乾隆間得真定梁氏影寫宋槧本舉盡心後章指之祇存梓匠輪輿章者悉補其闕刊而行之卽每卷首之篇叙不可復辨而章句全書亦以復還故璧矣離合顯晦之故聖賢心迹存焉非偶然也雖然複柱述聞豈無違闕談理猶易徵事實難予嘗序海寧周氏廣業孟子四考其時地出處考較之逸文異本古注三



考尤極典要爲孟子功臣項姜子孺山出所撰孟子篇  
叙相示叙序本通然與易序卦之旨異蓋叙其章之所  
以連與篇雖分而章可合者叙七篇中所見之人還之  
國叙國之人與事與地以還孟子之生卒年歲出處先  
後名因其舊知獲其新凡史記古史通鑑之牴牾讀其  
書論其世知其人視周氏所考時地出處事詳語簡釐  
然粲然各系之每篇之下尤便循覽其他考文辨義舉  
正名物制度之繁猶其易爲者也梓工旣藏以發凡語  
意未盡爰述趙氏之書不名注名章句而姜子之篇叙  
與趙氏不同庶讀者有以考業云

程愛廬雙松圖序

愛廬侍御以辛亥秋奔本生張太夫人喪歸松之朱涇  
旣葬主講席大梁越癸丑七月亟歸省錢太夫人僉以  
秋暑熾請杪秋而行不可則八月二十日抵家錢太夫  
人疾且病泊二十六日而卒終事無悔微孝感不至此  
錢太夫人爲太傳文端公女年二十而寡張太夫人  
三十一而寡於令甲一得旌一不得旌貞志競爽教侍  
御績學勵行成名以遂顯揚之志其揆一也先是歲戊  
申侍御請急歸葬兩太公購涉園居之涉園者程舍人  
珣四園之西園園有嘉蔭堂爲錢太夫人起居地嘗指

堂前松二株謂張太夫人曰吾娣姒猶此矣此侍御雙松圖所由作也間考詩雅頌春秋左氏傳戴記曾論松柏每並稱其性陽剛其材宏鉅其節目多且堅松爲千木之長其文從木其音從公爾雅釋柏不釋松而於樅曰柏身松葉於檜曰柏葉松身松柏之得天也獨乃其實無不同第松以喻高隱柏以喻義烈松舟寫憂衛女於父母未終時作以禮自止君子美之抑傷之至邨之柏舟本仁人不過而作朱子以謂衛莊姜詩鄘柏舟則衛共姜自誓之詩是以後世言女節者言柏不言松言松必言喬喬爲父象兩太夫人不改柯易葉之心不彫

之操母道也代父道之終矣當文端公致政後

純廟御筆喬梓圖以賜喬言高言上竦爾雅之釋木三  
言喬而三者中特言楸蓋稻樓椅梓之木多與楸類故  
舉楸以概其餘彼召南之喬木其木不得而知惟木以  
上竦之故而不可就息女以貞潔之故不可犯禮而求  
孔疏之說詩爲最善且南有喬木之義未始不通於柏  
舟一以終言一以初言禮義之化成慈孝之理備是圖  
也傳彼鄭氏之松七杜氏之松四陶氏之松孤烏足與  
較量哉益使予抱松楸之感也

居巢陸氏族譜序

有姓而後有氏有氏而後有宗有大宗小宗而後有族  
姓一而氏不一氏一而族不一春秋傳高陽氏才子八  
人高辛氏才子八人爲十六族胙之宗十一族惟羊舌  
氏在又羊舌四族是也氏族之學不明甚或并其姓而  
失之如信都耨氏其先本爲陸大陸爲姜姓而其後去  
大爲陸蓋以鄉爲氏之陸鄭略謂宣王少子通封平原  
郡鬲縣陸鄉鄉故陸終地第齊宣時安有郡縣之名且  
姓譜謂陸氏自通始卽楚狂接輿鄭何以略接輿之通  
而取齊宣少子之通可知漢魏以前世次茫昧雖隋經  
籍志譜系篇唐宰相世系表其間所載不過如世紀世

本之可信不可盡信而未必不誣其祖今陸望莫不云平原若吾郡平原村亦以機雲著門第偏重附會遂多微獨陸之氏爲然已陸君僑南以名進士教授吾郡出所修族譜示余其始祖爲明永樂間自吳遷巢之華一公公四子別爲四門君子世得第十君後又得五世凡十五世其在勝朝官於朝者二人皆中鄉舉其一殉崇禎七年流寇之難今則遊於庠貢於成均飲於鄉通於仕籍者不下三十人而成進士則自君始君長子炳奎亦已中副車家門蕃衍衣冠踰濟其昌熾將未有艾其譜首系圖次紀績有善書有大不善亦書以示警冒姓

及本非始祖後而累數世不能改者別著於錄恩明誼  
美簡而該核而不濫吾祖也吾知之不可知者闕之雖  
歐陽氏蘇氏之義例莫之過焉矣譜之創與修者曰七  
世孫侯選訓導龍騰 世孫選拔貢生 皆有功是  
譜者並著於篇

壻上海喬淦玉繩覆校

白華後稿卷之十三

南瀝吳省欽冲之簋

男敬樞星宰校字

壽序一

陳母楊太恭人七十壽序

五管介處嶺西丹銀竹木服御之產較不逮嶺南卽大家右姓聚處數萬指蟬聯登第者亦少概見歲庚寅子興行省試解禮部四十五人而北流之陳雋其三貢國子監九人而陳又雋其一考前後鄉試榜榜率雋陳一二人竊以念山川清淑之鬱積於一門抑其家之讀書修行有以致之非偶焉已也今戶部主事前翰林院庶



吉士陳君科錫爲予所傳四人者之一明年乙巳二月  
母夫人楊太恭人躋壽七十科錫乞予言寄歸侑醕而  
因爲序之太恭人毓粹名閥幼習禮教年二十歸贈朝  
議大夫融泉公公受廩於庠省試輒不利以不獲光其  
先學正公孝廉公之業爲憾雪窗雨隴未嘗有內顧憂  
堂上人箴紉滫瀡甘滑之奉胥太恭人是賴故娣姒雖  
有七而鉅細家政多以填委於科錫兄弟甚慈而嚴育  
小過輒予撻記洎科錫受官訓以勉職業毋炫徵逐科  
錫同祖弟科鋤早孤露撫之若已子戚族有不自存者  
多見周恤諸弱小息多就習女紅受女訓旣貴而約旣

壽而勤里之人稱女大師孫曾遶邾融融怡怡信乎其  
賢母之福已予觀詩魯頌如言壽母詩所言女德若采  
芣終風柏舟載馳大都處不得已之境其士大夫之妻  
采蘋言齋潔雞鳴言靜好祇人道之恒易恒之德爲貞  
故家人利女貞春秋二百四十二年孔子祇書一伯姬  
誠以婦人之德必不幸如伯姬而後乃以名於世彼采  
蘋雞鳴諸婦人錄之詩不必錄之史太史公不傳列女  
猶此義耳太恭人幸處其順無冰蘖以近赫烈之名乃  
恭儉慈惠備舉夫婦道妻道母道之實雖寢門萬里科  
錫力未遂迎養而名在 御屏萬鍾可待有季啓處

綵衣兒觥視四牡北山之詩人其厚幸宜何如者予誼  
處通門間見彰著從史臣之後執筆而撮其大凡後之  
言嶺西壺範者其有徵信也夫

樊省夫六十壽序

明東鄉艾氏南英言府州縣學生應學使者歲科試之  
苦臨川陳氏大士言其父爲村塾師一言一動不離學  
究家數往予心竊非之意艾固滑稽玩世陳殆心薄其  
父耳府州縣學生爲致身科舉之路人負科舉科舉何  
嘗負人且窮年抱槩求一廁府州縣學生而不得者何  
限陳旣失言艾亦未爲得也會稽學爲浙江大學學生

數百人其俗多族居而梅山善港之樊氏著籍者蓋數  
樊祖仲山甫自東漢壽張侯重以下世次秩然其扈遷  
臨安者自三十四世宋學生安國始其遷善港者自四  
十世可儀始又十四世而至廷簡以府學生舉乾隆己  
亥鄉試予實貳試事榜發來謁並出其尊甫省夫處士  
之文金進士傳世許以天崇人真面目者也廷簡貌樸  
而詞呐絕不類其文而處士少失怙於弟爲季所分屋  
數椽田二畝夙善病修脯力不贍塾師陳謝夏三君者  
愛之皆過於同舍任孺人歸室則告曰吾不及事吾父  
幸善事吾母吾少依兄嫂亦不可不敬事也伯兄邱嫂

歿撫其孤有成仲兄歿二十年竭力襄葬鬻所分田以  
舉仲兄之債褐衣疏食席硯代耕其不贍修脯者一如  
三君者當日所以待處士持金進士心喪經人共師于  
口若一籍諸生三十年頃始舍去廷簡今稍食其報而  
厥弟五人漸次鵲起天之將以昌之而始以嗇之人之  
始以難之而將以豔之自予習人事以來見夫素封之  
家游宦之子視兄弟姪若路人其暱之則藉以爲利日  
賸月削猶恐不足而繩屣革帶者流食力不給惻然皆  
孝弟之心此富不如貧貴不如賤而天必不使之久鬱  
鬱者廷簡兄弟以處士之文爲文尤當以處士之行爲

行枝葉雖茂胥比本根誦芬詠烈殆無有過於是者彼  
艾氏陳氏所稱尚謂之知道者哉吹笙鼓瑟朋酒具陳  
雖坐賓有感於子言也

于母王太孺人七十壽序

地道無成而代有終說者推之妻代夫之終臣代君之  
終其終也抑其成也成之效不同而所以成之之心與  
力無不同詩春秋所載共姜伯姬之節祇潔其身而止  
自列女傳載孟母斷機三徙事而代終之義始立然或  
心與力冀以終之而天不悔割又所生衆多雖嚴父不  
能必其子之盡肖僕焉寡鵠斯教斯率立身揚名苦節

獲甘若營山于母王太孺人其大彰明較著矣太孺人  
爲兩江總督王公新命曾孫女門廕鼎貴家範肅然從  
其考子端司諭永川櫛繼緘紉舉以身任讀書解大義  
聞人言忠孝節義事慨然如已親之洎繼室贈公雞鳴  
昧旦勸勉厲學公廩邑庠有聲僉以謂光其考刺史其  
王父太守之業承家科目指顧可俟值秋試歿于會城  
太恭人生男子子五其第六子尙在腹而前室段孺人  
遺女子子三長者僅及笄伶仃孤苦諸婢僕悉散去公  
繼母李宜人殷待仰事不一年刺史有核減官項追呼  
星火族人傳語太孺人以兄公雖物故有後當分償卽

其產已出質尚可斥賣數百金太孺人曰以君舅遺產了君舅官逋吾無憾賣兄公出質之產以肩吾數百金其如兄公後何遂盡斥已產及衣帔簪珥以償後十餘年兄公子皆自振贖所質而均分之人於是義其門而嘆太孺人之隱忍窮餓晝春宵杼兼子道父道之全無平不陂無往不復理罔以操之券也太孺人嫁女子子皆以賢孝聞其所生六男子先後入郡邑庠炳輝先後拔貢炳又與璵先後舉於鄉戊戌冬輝試吏粵西權灌陽富川縣旋知來賓縣板輿就養不改疏布詢輝日決事稍不協輒予譙讓閱五年而輝以疾去炳時試令皖



江假筦藩庫迎太孺人至署其三五弟旣隨侍輝亦病起道院入都院僚吏上太孺人壽間讀常氏士女志贊如南鄭楊拒有四男二女拒亡妻劉教之兄弟爲名士廣漢王敬伯妻梓潼文氏有前夫人子女並已所生男子三女子二撫育恩愛視繼若一王氏遂以世興章志貞教斯今婉昔至孝友風義之美有劉與文未之間者安貞協吉弗祿方長迴思迎輜返旆之初雁雁牙牙藐孤誰託冰天暄序曾不踰時此天道所必然而握管形者樂得而觀其旣焉子曩忝采風聲太孺人之所爲不易以觀七旬告躋斑衣有踐敬語詰其聰聽賢母之

訓以揚顯於無窮而可哉

丁簡齋七十壽序

吾門丁孝廉溶好學工文章留京師數年冀得一遇以  
慰二親以顯簡齋隱君之學此人情之所同然於養疑  
有不能顧也世之人子無不思父母之養遇則祿養不  
遇則耕養或父母善自爲養不必其子之養養在志不  
在力苟父母志其子之出而一遇而子不離左右以爲  
養無以爲悅親抑無以爲壽親焉矣溶二兄一弟自君  
曾祖祖父累世享大年年五六十始有子顧無別子君  
少棄舉業奔走江淮間求菽水之養家稍給從書賈假

異書且鈔且易且購日夕研覽稍暇輒爲詩由三唐溯之六朝漢魏以窮其源放而之宋元明以極其變由是參之史以求其事本之經以求其理博之星歷卜筮種植河渠諸家言以求其用覓句閉門嘔心擢胃教化廣大歲成一集以其習於咀吮之經導引之訣年及七十神明不衰蓋不獨家世多壽固以稟之所生而孺人稚子枯槁濁酒凡冲和脩遠超然自得之志志乎古不拂乎今足於已無待於外溶今者之志不過世俗之見云然於君寧有加損也歟問考唐以來詩最名者孟東野年五十二元微之五十三韓退之五十七杜子美五十

九若白樂天蘇子瞻亦未至七十七曰老而傳傳以  
學猶之傳以位耳溶兄弟傳君之詩養君之志子孫逢  
吉苟合苟完雖樂志論盤谷序池上篇之所云有無以  
易乎此者君姓名與近時龍泓居士同字與袁大令枚  
號同號與子弟省蘭校理同名字相配古今類然三人  
者先後不甚遠非有迭相慕向之意要皆以詩文名於  
時綜君之姓名字號而著之庶春城寒食之詩不妨同  
時流播也吳興清遠茶筍正熟奉觴引望白雲遙飛謹  
以聞之溶者駭舉之以爲壽如此

蔣聖木七十壽序

乾隆五十年正月辛亥朔越六日丙辰

天子懋繩

祖武舉千叟宴於乾清宮自王公卿尹武士封公屬籍  
未仕致仕者限年六十以上三千人爲斷薄海來轅師  
師秩秩涵和詠仁邁古饗老吾門蔣聖木楷以注遼縣  
令與其鄉蔣太僕良騏封編修周進士之鳳與焉太僕  
固朝官進士來就子養聖木聞

詔姪裝投牒時禮

部幾以人滿見尼寵際盛筵便蕃十資適是秋七旬揆  
覽乞予文壽之壽之文始自明代每類於俳優者之所  
爲若常人而與非常之典其遇不可謂不隆卽其文亦

庶以徵于後也聖木籍諸生三十年以序貢太學留肄  
三年主選訓導會予主文廣西舉鄉試以去於令當銷  
其所注者而以知縣注蓋是時年五十五矣使聖木不  
獲舉當蚤授官乃舉後十二年

天子簡四科以上舉人試授吏事其次授教職而聖木  
不獲與依人遠館貿貿入京幸而如所願以去予向疑  
臨川李氏絳記康熙壬寅宴事以謂千二百餘人四人  
一席當未得實茲宴倍廣專席同席以爵位爲差人賦  
一詩不能者內翰林代賦都爲一集雖成數三千而吾  
之門自聖木外未有與者卽吾郡獲與者亦止一人國

老庶老千載一時以視夫傳禮闈通仕籍之比比而是者其厚幸爲何如彼減年應官與夫督撫重臣之及年而有故不得與者於聖木能無以羨哉聖木有子二能力穡服賈以養而聖木若欲以有爲禮七十曰老八十曰下壽百曰中壽百二十曰上壽壽之於聖木未也其當養則老也故事禮部試 賜下第舉子八十上者檢討銜七十上者學正學錄銜又明年聖木將集試矣夫亦安知其不獲第者而銜固無不授也且又安知其不簡授吏事授教職也微此宴吾幾疑聖木之未七十矣

壻上海喬淦玉繩覆校

白華後稿卷之十四

南滙吳省欽冲之簪

男 散樞星宰  
散沐起元 校字

壽序二

邵梅林七十壽序

古獻壽之辭以詩不以文其爲辭以祝不以頌條舉件  
繫其人之生平登之屏幃以侑壽觥自明中葉始也羅  
念菴顧亭林黃梨洲謝祝辭祝之文或駢或散悻惻動  
人然梨洲以人子之壽其親大約在六十後蚤則五十  
是我生之辰雖不必自爲壽而人子無不可爲親壽壽  
而乞言於人猶古正告於先生君子之義也予同年梅



林邵君生梨洲之鄉未晬孤露四十而舉孝廉賀客填  
座觀優演孟母故事君涕洟被面此後不復與聞樂又  
以太夫人春秋高不敢違膝下比卒養年已六十故籍  
禮部三十年未嘗識禮闈予亦迄不獲識君去年四月  
予磨勘會試卷至喆嗣編修瑛對策歎其研貫經史不  
墜其鄉先生之緒逮以後進禮謁言家有餘師自就塾  
後見通志堂所刊經解皆丹黃校勘不第如望溪方氏  
之僅經一過卽家間往復至今不涉行草一筆此雖精  
神強固足以操上壽之券抑以見精熟宋五子書而體  
味夫窮理主敬之學者不遺小物若此矣君之學未甚

顯於世其未甚顯於世直以重違其親泊瑛掇上第遊  
玉堂鄉之人多瑛之學而尤多君之學與其行君每言  
古無生日禮旣孤則更不可改雖遇生日不受親舊一  
卮酒今齒登七秩正

聖天子推仁布德廣宴千叟之年向使君就養京都當  
布席授杖與上方珍異之賜而鄉園樂志不世之遇敬  
以俟之後時康強逢吉相莊無恙俞夫人少於君四歲  
閨闈之內雍如秩如鄉之人暨年家子弟詣予請爲一  
言予惟東坡在海外時其子過時出一篇則爲數日喜  
寢食有味且比其文以金玉珠貝瑛以上第顯其親不

難自以金玉珠貝之文娛其親而爲壽第以予之固陋  
要能頌君學行之實之大而無取乎誇張侈大之言南  
陔具奏嘉賓燕綏聞其風者亦油然而生孝弟之心也  
夫

曹母朱太夫人八十壽序

今戶部尙書兼管順天府事欽曹公以大雅宏達之材  
起家翰林直內廷歷大用歲柔兆敦牂如月 命察  
兩浙倉庫虛實瀕行頒玉無量佛數珠如意杖貂幣冠  
以 御書南陔衍福扁額使使載奉至家清侍浹旬  
壽太夫人八十然後還朝萬流忻慕傾聽朝野僉以謂

太夫人生長廕厚而惇尚節儉衣帔有一二十年不改製者惜福者福自應之宜壽一蚤嫗婦功曰嬪後手操井臼以贈公客遊遠持家政幾四十年流水戶樞宜壽二兩家故巨姓仰給者無慮百數十人撫贈公之甥甥女六人如所出鄰黨告緩急必濟宜壽三三者舉足以壽矣壽固福之演矣乃太夫人之德之大者事繼母以孝聞修婦職不以戚姑係已之姑弛其敬事兄姁必請命行語曰南陔廕孝友缺承學之士猶難以言之此不第已貴而勤已富而儉與夫黽勉有無之求而惟奎章褒美之有以旣其實也小雅鹿鳴之三爲燕羣臣

勞使臣遣使臣而作至南陔之戒養白華之潔白華黍  
之時和歲豐毛公次之魚麗之後與由庚三篇同爲笙  
詩詩辭旣佚束皙修鄉飲酒禮述小序之旨爲補亡詩  
六首昭明取冠選詩而後之人或少其意味我  
皇上治內以天保以上治外以采芾以下比取

御製補笙詩揚扞中外裨樂工奏諸鄉飲順天爲首善  
地及今春始舉之省欽從公後迎賓送賓聞笙入之奏  
以戒養始以萬物各得其儀終翕如釋如竊以歎薰蒸  
融液化民成俗之美曾未淹月而公簡書奉使俾慰懷  
歸  
寶翰裔皇特有取於笙詩之首南以長養言陔

以隴言以戒言而笙以生言又可徵之難老之義觀古  
盛時體臣下之情以孝治天下於其遣則送之以禮樂  
而有光華於其來則以有功而見知而曲達其致養之  
志故四牡之詩一言將父再言將母凡所言靡監言不  
遑者祇先事靖共之意而要之事無不集卽親無不安  
歌之燕則以美天下之爲人臣爲人子者而王道於是  
乎行歌之鄉飲則以教天下之爲人臣爲人子者而王  
道於是乎明笙奏諸篇猶此義耳太夫人之教公兄弟  
也嚴而人子之養其親至公而無以尙微特夕膳晨食  
晝之詩不足以言卽四牡詩人之父若母視太夫人何

如哉然則觀太夫人之致孝而福以臻觀公之致身以致孝而福以衍彼無辭有辭之辨祗夏陔夏之考初不暇舉舉其大者以誦

侍讀學士王公沈恭人壽序

古無上壽之禮而書詩多言壽此後世上壽之辭所自也書傳壽百二十年左傳注百年爲上壽論年者以十爲差故尙年亦以十爲差近世於生日逢十曰正壽逢九曰做九逢一曰滿旬如七十一滿七十之旬者是亦曰開秩如七十一開八十之秩者是往歲旃蒙協洽植庭先生偕沈夫人年六十爲壽於春甫編修粵西使署

又十年歲旃蒙敦牂春甫歷侍講學士視學湖北先生偕夫人年七十沂江就養載言介景粵與楚予使輟嘗至都人士自彼至者既有侈學士之有以效臻養而備諸福矣去年冬先生自楚還石埭學士亦還朝士出學士門者將以今年冬先生生日壽先生並壽夫人而乞予爲之言予將言先生與夫人之八九十而學士復壽於使署耶而其事已習予將言先生之砥行礪學如律呂河渠專門者未之或先夫人又以恭儉慈惠相夫子而昌其後耶而其理已信予將言先生之困諸生以高才登拔萃利異日如漢伏生轅固之徵且起耶而學士



領清華侍尙書房於 皇家得稱師傅學士之所爲學  
與教皆本先生之教與其學而其施愈廣其報愈侈予  
將何以爲言第自予稍通人事以來見庠序學校之彥  
非科名無以致身僅而得之如牛毛之有麟角後之人  
履其盛前之人處其難彼功深名遠之說當統一家爲  
言而不止以一身言言乎數則得失不常言乎理則陰  
陽見重先生誕生時伯考贈中憲大夫汝信公夢見堂  
之榜爲公名竟嗣爲後而本生考贈中憲大夫鳴瑞公  
學行備修與汝信公有經人師之目詩禮之澤韞而日  
輝天欲使世之學子以積善績文爲勸故特於先生偕

壽且正壽之辰奉觴使署蒿目睽睽歆羨贊歎相與爲上壽之辭其門人之未獲與者復以滿旬之次年順情達禮文而不浮質而不僣予爲推極其本以見理數之固然而先生子四人孫八人曾孫一人方熾昌保艾衍其慶於無旣焉匪且斯且匪今斯今請族之八九十以上而筆之也可

叙州朱茗翁六十壽序

叙之郡瀕大江環山土地肥美鹽穀蔬果百產之饒甲他郡郡屬縣富順尤美童子試且二千人文亦較有法度故科名之士爲多其鄰縣興文試童子者僅十之一

往歲癸巳余按試叙郡興文兩朱生旣籍名就試而邑之人訐之謂生父子僑富順富順人則謂生祖父故興文學弟子員案驗旣實乃令試興文偕雋乙未借食餼丁酉兩生之次者以拔貢生舉於鄉其長者亦以鄉舉每詣予京邸述先世隱德與尊甫若翁行事今年冬十二月翁六十初度而德配黃夫人亦以來年秋七月躋六十長者試南宮僥得旋失次者試爲令山西乞予質言以侑爵焉翁爲叙名族其先東絡公仕明始顯十餘傳而至子範公好善樂施年四十始舉翁翁少慧讀書輒了大義髫髻失恃而沈靜真篤能得繼母歡弱冠補

博士弟子員事子範公至八十三而棄養喪葬無失禮  
黃夫人捍擋內政凡所以型家庭與遇鄉黨僚友者皆  
禮有以接恩有以愛移家富順後業漸起五子者文行  
亦益振興文旣引翁父子爲重而富順人亦樂得以爲  
寓公夫朱之著莫如文公公家建陽已闔兩世而婺源  
乃其本貫且功令父子兄弟不得異籍欲改籍者必俟  
居新籍二十年後其舊籍又無可歸始得告之官入新  
籍夫豈爲其進取之難易而然凡以停間里之吏聯墳  
墓之族使人優游漸漬而不自知也翁今年始杖鄉迴  
思兩生者童試之初忽忽十七年再後十七年而翁與

黃夫人且垂八十子若孫必曰昌抑其所以致此之由  
吾願興文人思之亦願富順人思之毋徒以物產之饒  
山川之清淑爲相炫耀云爾

任樹屏七十壽序

天津上應箕斗間曰漢津亦曰析木之津箕在東方位  
木斗在北方位水水木分析處以箕爲次不曰析水而  
曰析木其次自南而北也都會勃碣理大物博財貨之  
阜甲畿近

天子省方五至瀛平淀清蒙福無量今年春三月載勤  
六幸慕思喁喁雷動雲集雖工作供頓一絲粟不

煩於民而周筴所擅舉將各罄其誠準古衢巷歌舞之  
義先期兩月爲樹屏任翁七秩之辰其子姓綵衣羅戲  
請予舉其槩以諭於衆曰古七十曰老百二十曰壽語  
曰仁者壽又曰孝弟者爲仁之本孝弟而僅與犯上較  
其義似已淺矣唐張公藝九世同居以忍爲教忍與犯  
近而君子顧有取焉謂其無與於仁而未與於不仁之  
甚也仁無不讓禮之實在讓古之時公卿大夫田祿有  
以收其族其族又皆有職業而不盡待收於宗子後世  
無恒祿無恒產無恒業各自食而不以相顧甚者至於  
相爭苟舉大功同財之義斷如秩如於以厲末俗而返

之於淳卽報施有不爽耳翁仍世富厚繼乃中落伯兄  
既蚤逝與季弟藏軒同心併力敦尙信義迄于今未嘗  
離析入其門誦弦之聲與籌算之聲相荅諸從子先後  
籍諸生子秉淳名在賢書趨承庭闈偕老具歌先是有  
窺伺不逞者欲以非法之法中翁兄弟主是牘者不逾  
時遭異疾以死翁兄弟故壘依然所業反以日起然後  
知孝弟之所以爲仁仁之效必壽今 國家化成仁讓  
太和翔洽薄海內外以五六世同居及親見七世受  
旌者不下五百家翁今七十藏軒六十五耳遲之八九  
十歲時子姓日益蕃讀書致身故業亦日盛此和氣感

召必然之理所爲數齒以待也翁之生以月正二日於  
古元日上壽者爲近固辭再三不得已而徇子弟之請  
閏月成禮斯亦翁禮讓之一節可以風世者故並誌之  
堦上海喬淦玉繩覆校



白華後稿卷之十五

南漚吳省欽冲之簞

敬樞星宰  
校字

壽序三

寧州朱坦坦五十偕壽序

寧之州爲洪都之右臂楚鄂之南屏其山旌陽鹿源毛竹幕阜其水修鶴源其產絲麻杭稻茶竹木其人習勤慎儉去爲賈及浪遊者鮮承學之輩薦紳士大夫相望歲壬子朱生學宗舉於鄉叩其系出婺源徙於寧且五百載叩其兩親年皆四十餘有弟二而生爲長今年生過夏留京師以尊甫坦坦翁生四十有八而是冬十一

月則母夫人五十設悅之辰江西之俗稱壽必於九謂之祝九以四十八益一以五十損一合之皆四十有九而乞予言其槩予惟朱氏自仁亭先生博聞強識講明宋四子之學其行善不稍怠州之中推長者而夫人父副貢進士劍亭公之孫世章爲余主癸丑會試所得士嘗述其祖教甚篤當相攸時以坦翁卓犖有文章能寵其門閭夫人旣嬪婦職修謹烹調縫紉縫櫛之屬不敢以談媼婢慎終追遠凡襄禮勿之有悔而仁亭先生生坦翁晚授經之外命攝家政以世其學以世其德有後蔚興吾不知其所以施與所以報者何如而春秋鼎富

足跂之而目逆之要亦事理所固然焉爾比世以來間  
有自壽詩文其辭之者或亦過矯以人子而乞言壽其  
親於義無可譏惟是愛日之誠必宛委遷就以徇祝九  
之俗者得毋以天地之數非十不全陽數統陰至九已  
極太元八十一家此物此志大衍虛一用之尤不盡焉  
寧雖大州而三千里外顧雲佑爵計兩親之年合之曾  
未滿百者曾有二哉孝經言揚名言顯父母蓋揚其親  
有君子之名而親於是乎顯予之言詎足以顯翁與夫  
人而生之志乎名以既其實者必有以養翁與夫人之  
志而名且無窮歌詩荷瑟之餘吾知親心遠慰必以爲

生雖未侍側而忻然進一觥也夫

張封公七十壽序

水之流皆東獨吾邑東枕海築塘捍之黃浦帶其面南受海潮之北來者並浦支河潮至則流東潮退則流西潮行挾沙隨入不隨出易以闕墊旱潦無以備其牖港爲黃浦大支鹽塘自航頭北達下沙鎮六里又大支之小支也予家下沙鎮方童時鹽塘平若地邑尹韓侯於乾隆辛酉春治之是年予季父選拔萃旋舉鄉試董其役者劉述田王藻廷各以艱嗣舉子六十年來間事撈治而鎮東西有河亘二里居人稠聚埽飛灰棄舟浮水

不盈尺百貨壅阻微特卑濶之爲厪已嘉慶丁巳冬爲  
吾一山邑侯蒞政之二年政通人和百廢具舉於是治  
閘港之身自曾滙至新場凡三十里治鹽塘及下沙鎮  
河凡八里克期蒞役沛然浩然萬口臚頌越明年戊午  
正月庚寅子弟省蘭擢貳工部二月壬子予擢臺長予  
何德於鄉之人而鄉之人若以爲予兄弟喜侯亦非市  
德於邑之人而邑之人德侯因德封公洙源先生先生  
於書無不窺餽究郡庠二十年省試不得志養日遂行  
日修講求有用之學以貽吾侯者日進侯司鐸文登以  
民社薦治婁以繁缺薦治南滙以卓異薦孔子曰立身

行道揚名於後世以顯父母又曰君子也者人之成名也百姓歸之名謂之君子之子然則名非祿位之謂顯揚亦非如後世封誥其子之謂特君子之名得封誥其子之祿位而始顯予少習人事以還每見富貴致身必非無本若親民之吏利病遄及於民轉非若憲司以上者疴癢與民遠俟之所以利吾邑者難得而具廬而三年報績

特予叙遷旣得乎事君立身之道以悅順乎先生卽牐港之利不在乎魚鰕荳葦之產并不在宣洩蓄儲之節而在便民出入以阜往來行貨之財用至鹽塘止一小支下沙鎮河其利病止前後左右數里而

子家起跡多逢大興水利之年或者五行先水水德主  
潤故潮汐所至之處或暗而生或洄而轉其民多蒙福  
其官斯土者大都得氣遷去計吾侯之爲治如水有源  
必稟庭訓口講指畫信而後勞由是胥吏不以侵欺工  
役不以簡率予始聞魯漚至新場之告浚方自忘其不  
文將以碑紀其成績嗣又聞鹽塘蕝役適予兄弟疊蒙  
恩擢之辰他時書之邑志有足徵祥異者縱祥異  
不必徵而行水之利民不可不徵予惟先生覽揆七十  
在己未之春文孫 計偕公車竚宴聞喜而羔羊朋  
酒予兄弟不得以親與美侯之行道揚名得君以得親

者從此益大且遠而樂序之以爲壽

陳母郭太宜人六十壽序

皇上受禪之三年秋吾門陳君靜齋守絳五年矣遣人乞以文壽其母夫人問之曰明年六十也曰何以亟也曰豫也易元貞之義前十之年加一而成後十之年加一而生此潛邱閭氏之言也用豫斯用九也曰何以不告月若日也曰過時也月五日十六也曰未及時非過時也曰壽則稱六十也曰封太宜人何也曰初封孺人也母存父歿晉稱太也太宜人爲夔右姓少習禮尊甫定遠司訓仕徵公鍾愛之年十六繼配於封文林郎晉



贈奉政大夫

先生時營力鹽廠奔走日不暇而靜

齋甫七歲女兄弟皆一太宜人慈愛備至修幣婚嫁之力視所生有加就養逾十年一如其在家在冷署非有事不衣帛不重肉園池隙地課芹韭以瀹食晨起率子婦治針黹職中饋以爲常乃奉政棄養時織悉皆中禮其遇戚里皆有恩人以是賢太宜人又以是賢靜齋卽其爲繼母非繼母日習焉而若忘轉於五花書誥六曲書屏而後得其實也古者父子重而夫婦輕其繼室多以娣姪又繼母與慈母埒又其所以繼之故或早世或被出其夫曰繼耳其母其子亦曰繼耳繼耳孝已伯奇

之遇雖聖賢無以刑之彼中有不足者則又避嫌而過  
溺觀史冊所傳子之善事者多母之善撫者鮮第以天  
下有不孝之子無不甚慈之母苟繼母之見化于子且  
化於母而太和大順之治聞者見者誰不油然而生孝弟  
心也於戲繼母配父與因母同此爲人子言也繼母爲  
父所出不服此爲爲繼母者言也先王制禮示繼母以  
不敢不慈而示人子以不忍不孝孝慈之誼衰故涼薄  
之風長當太宜人初撫靜齋時豈不期所生男女之至  
有四而食其報者始自今卽靜齋就塾時寧必料已之  
獲報夫太宜人而紀其盛者亦自今此由我

聖朝仁讓帥從融洽蒸遍庠序之教游被閨門靜齋爲  
校官既能承其繼外祖之所以教者用慰太宜人之心  
迨用之劇縣而然用之方州而復然昔范文正公自以  
一生得力在官教授時起特文正於母有遺憾而靜齋  
于母有孝心是又所遭之幸不幸而非人之所爲也爲  
之序冀以詔人倫之矩而垂女史之箴焉爾

張母高太孺人八十壽序

倉吾邑之米於周浦徵諸民兌諸運丁漕諸黃浦以達  
通潞每十一二月間功令克期當竣邑地氣較遲一二  
候產米少或糴自他邑若畸零雜碎之故他州府開舫

先後之次非開篆後弁丁不能運以行周浦蓋巨鎮誦  
茲稗販萃處填委析縣置倉邑之長治漕來駐倉囂隘  
不足以棲其家自仲冬至春孟兌竣乃返治不可緩亦  
不能以急仁和張侯雪舫莅政之三年歲壬戌正月十  
五日太夫人悅辰屆八十先一年十一月吉集僚友諸  
里老及戊午庚申辛酉三科分校省闈所得士奉壽觴  
而問序於子子於侯辱一日之知知其學之粹行之修  
又以見其政之美而不擾於民方太夫人歸晉揚太翁  
時翁少孤鮮兄弟棄舉業學廢舉策賴太夫人善操作  
以女紅佐不給每課侯習誦夜漏三四上始退於仲叔

子亦然旣弗克逮尊嫜則迎所生兩親於家所生亦忘其爲無子慈惠恭儉雖臧獲未嘗加呵譴其壽也翳其德也杭俗近唐魏世族多以禮自持鮮驕夸侈靡之習牧民者多不敢自攘府庫而虐取其民邑境雖僻左秔稻之美吉貝之利魚蟹之美蓮塘梅塢之勝民氣愿樸號易治太夫人習而安焉所少者桑土耳詩曰十月穫稻爲此春酒以介眉壽稻者糯之專名其性黏故宜釀說文沛國謂稻曰糯是也秔特稻屬後世竟以稻爲秔糯之通名不知月令命大酋言秔稻豐年詩黍稷爲酒醴皆以秔釀酒之證其於秔無與今吾邑所漕之米皆

杭惟搭運間有穠穠斯宜釀釀以十月則介壽之在十月後可知惟古人率以歲始上壽至唐元宗始以生日立節名而遼世君臣往往各占令節爲生日生日之禮非古養老之禮伊古養老古自五十始近世於生日之屆十曰正壽於十有九曰做九於十有一曰滿秩誠以愛日無窮至上壽而禮倍崇愛倍篤元夕又令節太夫人適於是生而侯勤於所職恐及期而數十里之程官事摩盪乃於穫稻之初預修觀燈之事年豐人和繞膝燕喜於太夫人有詒穀之謀於侯有祿養之樂而於禮一一因乎時合乎古予故據典徵之而僂指及門若太

夫人與侯所遇者其數數見哉過此以往雖歲舉可也  
抑幽詩人之義也

### 王孺人壽序

予里居廐門不復與賓客之事今年三月錢唐門人壬  
戌榜朱吉士廷慶來謁言以上年冬歸省兩親蓋坦園  
封公年十七而爲學官弟子負文譽顧試累不售自廷  
慶及叔弟福年以乙卯登師門廷慶成進士之年次弟  
福慶亦以明經注校官皆同母產也庶母弟福皆福順  
福寧今次第就塾吾父雖不得志於身而心用少慰旣  
退則以長句求序其母王夫人壽母少坦園二歲恭儉

慈惠恩義兼至今六月十一爲六十晬辰請急言歸爲省其兩親而因以壽其母也予觀爲酒介壽之義見於風壽母之名見於頌非如近世爲壽之文不根於古誠以元辰令節無時不可上壽而非必有待于生日乃近世父母年相差者其子求人合製雙壽之文事近不經直與不知父母之年等父天也母地也父生母成其恩誼無二乃或抑之使後或移之使前毋亦徇其名而忘其實矣母今年六十當六十二時坦園始六十六十曰耆耆未稱爲老而古之養老自五十始由家而鄉而國凡燕射食饗之節秩然有文若國老庶老尤必加之禮



以坦園之學行異日者當有纁幣相迎徵諸公車之事  
令妻偕老何媿乎古詩人所云而吉士兄弟學日勤名  
位日進所以先爲母壽後二年而復壽坦園者方未艾  
也吉士詩筆力健舉不徇于世俗雙壽之文而先眷眷  
予一言其義創而文之體亦創爰質言之爲乘韋之導  
爾

增上海喬淦玉繩覆校